

Awe nochi! Despues di trabaonan duro!

Edjean ta estrena su cancion promocional pa e temporada di fin di aña!

STA. CRUZ -- Aruba, segun e informacion cu "Solo di Pueblo" ta dispone di dje, awenochi den e programa "Na Drempel di Fin di Aña", e hoben cantante, popular pa su produccionnan masha gusta di fin di aña, esta Edjean Semeleer, lo lanza su cancion promocional nobo nobo.

Locual cu nos a logra haya sa, ta cu exactamente aki 5 dia, esta Diarazon dia 18 di Oktober, e produccion mes, esta e siguiente volumen di "Hey...ta Pasco!", lo wordo poni oficialmente riba Mercado. Mas cu claro esaki no por pasa sin e lanzamiento special cu tur aña ta compana "Hey...ta Pasco!". Y e aña aki e lo tuma lugar riba Diarazon mes den e hardin di Instituto di Cultura.

Ya caba nos tur conoce "Hey...ta Pasco!" vol 1, 2 y 3, pues nos tin un idea di kico por spera nos awenochi. Espectativanan ta hopi halto. Tur hende ta ansioso pa scucha ta kico Edjean ta bay presenta e aña aki. Loke nos ta sigur di dje ta cu e calidad y potencial di ambos, pues produccion y cancion promocional lo ta excelente. Nos tur por corda

e exito di aña pasa, gusta pa grandi y chikito, esta e "Bus di Alegria". Te hasta ringtone pa bo celular Edjean a logra pone riba mercado aña pasa di e cancion aki.

E informacion cu nos por a logra haya di Edjean ta cu e aña aki no ta excepcion. Cu sigur su cancion promocional lo ta uno hopi pegahoso y comercial. Componi atrobe pa e maestro Chucho Hoek y graba den e studionan di nos amigo Ivan Quandus, esta IQ MUSICLAB. E musiconan profesional no por falta atrobe. Ya ta un tradicion di Edjean cu tur aña e ta traha cu e "crème de la crème" riba e tereno musical di Aruba, sigurando asina un produccion di calidad. Y claro, atrobe e ringtone no por falta.

Pa loke ta e produccion nos por a compronde cu e aña aki e lo ta uno hopi special. Cu un cantidad grandi di tema riba dje. Edjean a conta nos cu el'a percura pa su produccion atrobe ta uno hopi varia cu lo cay na agrado di un y tur. El'a indica cu e produccion aki a wordo realiza "A peticion general". Mucho mas Edjean no kier a divulga. Pues mas ansioso

e ta haci nos pa scucha e produccion.

Ya ta un tradicion cu e tan popular hoben cantante aki tey semper tur fin di aña cu su produccionnan masha gusta pa un y tur. Pues nos no por imagina nos un fin aña sin e dushi cancionnan cu Edjean ta presenta. Como e unico cantante solista, entre tur e gruponan di fin di aña, cu ta produci un CD completo, sigur el'a demostra cu tur su empeño, dedicacion y exitonan pa cu su trabao ta pone tur hende tene cuenta cun'e tur fin di aña.

Algo cu sigur a laga nos mashacuriosota e comentario cu Edjean a duna "E aña aki no ta solamente cd so tin, si no hopi sorpresa mas".

Ta di keda hopi pendiente pa sa ta kico e tin prepara pa Aruba.

Pues Aruba, bo ta keda cordialmente invita pa sintonisa "Na Drempel di Fin di Aña" awenochi.

Nos di "Solo di Pueblo" kier a probecha di e oportunidad pa gradici Edjean y alaves felicit'e pa cu su tema promocional nobo y tambe dese'e hopi, pero hopi exito pa cu e temporada druk pero sigur dushi nos dilanti!

